

Prologue.

Best vray que apres que boece de cōsolacion eut fait et compose son liure ainsi appelle boece de consolacion. desirant yceluy boece de bien en mieulx consoler et cōforter toutes gens et de tous estas tāt haults moyens comme bas qui hauroiēt besoing d'auoir paciēce en toutes leurs aduersites. et meismement que ceulx qui seroient oultragez et offensus deussent haouir paciēce sans courrir a vengāce. et que en ce faisant en attēdāt et en ayant paciēce ilz peussent mieulx haouir satisfaction et rayson de leurs dommages et interest plus tost que proceder par vengance. il fist et composa vng traictie lequel il extrait de certaine histoire laquelle il trouua en escript. et en laquelle estoit cōtenu entre plusieurs aultres choses q̄ vng noble seigneur puissant redoubte et riche nomme melibee eut vne femme appellee prudence. de laquelle il eut vne seule fille. laquelle troys de leurs ennemis mortelx bati rent et naurerēt enozmeement et mortelement de cinq playes mortelles en son corps. et ce firent oultrageusement en la propre maison du dict seigneur en la quelle ilz entrerent par eschielles. Et ce fut vng iour que ledict seigneur estoit ale a lesbat. et haouit laissie sa dicte fille avec sa femme prudence en la presence de laquelle mere la dicte fille fut tresuillainement et cruellemēt batue et naurée. Et quant ledict seigneur arriua au dict hostel voyant ainsi sa dicte fille naurée et mutilée fut quasi tout desespere. Et incontinet fist assembler plusieurs gēs iennes et vieulx. entre lesquelz estoiet aucuns de ses anciēs ennemis q̄ estoiet reconseillez par semblance et retournez en sa grace. et aucuns de ses voysins q̄ plus luy portoient de reuerēce pour crainte que pour amour. et qui estoient en uieux sur luy. et aussi aucuns flateurs et losengiers. Et apres ce que ledict seigneur douloureusement eut compte sa complainte et demande conseil fust conclu par les dessusdicts promptement que on procedast a vengance. Et quant dame prudence sceut et entendit ceste deliberacion incontinet et sans delay se tyra par deuers ledict seigneur en luy priant humblemēt que si soudainemēt ne voulust proceder a vengance en ceste matiere. et quil luy pleust d'auoir paciēce. et que se ainsi le vouloit faire mieulx sen trouuroit a la fin que de proceder par soudaine vengāce. en luy remōstrāt disant et allegāt plusieurs belles et bōnes raysons et auctorites en allegāt la sainte escripture viel et nouueau testament salomon dauid seneque et plusieurs aultres saintes et dignes auteurs

¶